



სახელმწიფო შესყიდვების  
სააგენტოს თავმჯდომარის  
გ ა ნ კ ა რ გ უ ლ ე ბ ა



KA080157210397519

№ 2261

13 / მაისი / 2019 წ.

**შპს „მრავალკუთხედი“ შავ სიაში დარეგისტრირების შესახებ**

**შემსყიდველი ორგანიზაცია:** სსიპ „შემოსავლების სამსახური“;

**ტენდერის ნომერი:** SPA180001626;

**შესყიდვის ობიექტი:** 71300000 – საინჟინრო მომსახურებები;

**მიმწოდებელი:** შპს „მრავალკუთხედი“ (ს/ნ: 437061144);

**წერილობითი შეტყობინების საფუძველი:** სახელმწიფო შესყიდვების შესახებ ხელშეკრულებით ნაკისრი ვალდებულებების არაჯეროვანი შესრულება.

**აღწერილობითი ნაწილი**

**1. ადმინისტრაციული წარმოების დაწყება**

1.1. სახელმწიფო შესყიდვების სააგენტოში 2019 წლის 14 მარტს წარმოდგენილ იქნა სსიპ „შემოსავლების სამსახურის“ 2019 წლის 14 მარტის № 21-02/27231 წერილობითი შეტყობინება (რეგისტრაციის № 2871), რომლითაც სააგენტოს ეცნობა შპს „მრავალკუთხედი“ (ს/ნ: 437061144) მიერ SPA180001626 ელექტრონული ტენდერის საშუალებით დადებული 2018 წლის 20 მარტის № 1/159 სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულების თაობაზე.

1.2. შპს „მრავალკუთხედი“ სააგენტომ, სახელმწიფო შესყიდვების ერთიან ელექტრონულ სისტემაში მის პროფილში მითითებულ ელექტრონული ფოსტის მისამართზე artidea2015@gmail.com, 2019 წლის 18 მარტის № 1122 წერილით აცნობა სააგენტოში შემსყიდველი ორგანიზაციის წერილობითი შეტყობინების წარმოდგენის თაობაზე და, სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-5 მუხლის მე-5 პუნქტის შესაბამისად, სთხოვა ხსენებულ საქმეზე განმარტების წარმოდგენა. მიმწოდებელს განმარტება არ წარმოუდგენია.

**2. შემსყიდველი ორგანიზაციის პოზიცია**

შემსყიდველი ორგანიზაციის წერილობითი შეტყობინების თანახმად, მიმწოდებელმა, მიუხედავად გაფრთხილებისა, არასრულად შეასრულა მხარეთა შორის გაფორმებული 2018 წლის 20 მარტის № 1/159 სახელმწიფო შესყიდვის შესახებ ხელშეკრულებით ნაკისრი ვალდებულებები.

**3. მიმწოდებლის პოზიცია**

მიმწოდებელს ადმინისტრაციული წარმოების ფარგლებში განმარტება არ წარმოუდგენია.

**4. სააგენტოს მიერ დადგენილი გარემოებები**

4.1. 2018 წლის 7 თებერვალს სსიპ „შემოსავლების სამსახურმა“ გამოაცხადა SPA180001626 ელექტრონული ტენდერი საინჟინრო-საპროექტო მომსახურების (CPV71320000) შესყიდვის მიზნით.

4.2. სატენდერო კომისიის 2018 წლის 13 მარტის № 3 სხდომის ოქმით, ტენდერში გამარჯვებულად გამოვლინდა შპს „მრავალკუთხედი“ (ს/ნ: 437061144) და იგი მიწვეულ იქნა ხელშეკრულების გასაფორმებლად.

4.3. მხარეთა შორის 2018 წლის 20 მარტს გაფორმდა № 1/159 სახელმწიფო შესყიდვის შესახებ ხელშეკრულება, რომლის თანახმადაც, მიმწოდებელს შემსყიდველი ორგანიზაციისთვის უნდა გაეწია საპროექტო-საინჟინრო მომსახურება ხელშეკრულების გაფორმებიდან 60 კალენდარული დღის ვადაში, 2018 წლის 20 მაისის ჩათვლით. ხელშეკრულების ღირებულებად განისაზღვრა 37 561 ლარი, ხოლო მოქმედების ვადად – 2019 წლის 31 იანვარი.

4.4. მიმწოდებელს შემსყიდველი ორგანიზაციის 2018 წლის 22 ივნისის №21-02/81289 და 27 ნოემბრის №21-02/143981 წერილებით მოეცა გაფრთხილება ნაკისრი ვალდებულებების შესრულებასთან დაკავშირებით. ამასთან, მიმწოდებელს ეთხოვა დოკუმენტაციის წარმოდგენა 2018 წლის 30 ნოემბრამდე.

4.5. საქმეში არსებული სსიპ „შემოსავლების სამსახურის“ ფინანსური დეპარტამენტის ინფრასტრუქტურის განვითარების სამმართველოს უფროსის მოვალეობის შემსრულებლის 2018 წლის 14 დეკემბრის №139288-21-01 მოხსენებითი ბარათით დგინდება, რომ მიმწოდებელმა შემსყიდველ ორგანიზაციას 2018 წლის 30 ნოემბერს წარუდგინა საპროექტო-სახარჯთაღრიცხვო დოკუმენტაცია, რომელიც შეიცავდა არაერთ ხარვეზს.

4.6. მიმწოდებელს შემსყიდველი ორგანიზაციის 2018 წლის 27 დეკემბრის №21-02/156434 წერილით ეცნობა პირგასამტეხლოს დაკისრების თაობაზე.

### **სამოტივაციო ნაწილი**

#### **5. შემაჯამებელი დასკვნა**

საქმეში არსებული მტკიცებულებებისა და გარემოებების შეფასებისა და ურთიერთშეჯერების საფუძველზე, სააგენტო მიიჩნევს, რომ შპს „მრავალკუთხედი“ უნდა დარეგისტრირდეს შავ სიაში.

#### **6. გამოყენებული სამართლებრივი აქტები**

სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესი და პირობები“.

#### **7. სამართლებრივი შეფასება**

7.1. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-3 მუხლის მე-4 პუნქტის „ბ“ ქვეპუნქტის თანახმად, სახელმწიფო შესყიდვის ნებისმიერი საშუალებით განხორციელებისას, გარდა კონსოლიდირებული ტენდერისა, პრეტენდენტის/მიმწოდებლის შავ სიაში დარეგისტრირების საფუძველია, თუ მიმწოდებელმა ვერ შეასრულა ან არაჯეროვნად შეასრულა ხელშეკრულებით ნაკისრი ვალდებულებები. იმავდროულად, აუცილებელია, რომ ხელშეკრულების მოქმედების ვადა იყოს გასული ან ხელშეკრულება ვადაზე ადრე იყოს შეწყვეტილი.

7.2. იმავე წესის მე-7 მუხლის მე-2 პუნქტის შესაბამისად, საქმეში არსებული გარემოების გამოკვლევის, შეფასებისა და ურთიერთშეჯერების შედეგად, სააგენტო ადგენს, არსებობს თუ არა პრეტენდენტის/მიმწოდებლის შავ სიაში დარეგისტრირების საფუძველი. იმ შემთხვევაში, თუ არსებობს ამ მუხლის მე-4 პუნქტით გათვალისწინებული გარემოებები, სააგენტო იღებს გადაწყვეტილებას პრეტენდენტის/მიმწოდებლის შავ სიაში დარეგისტრირებაზე უარის თქმის შესახებ, ხოლო იმ შემთხვევაში, თუ არსებობს პრეტენდენტის/მიმწოდებლის შავ სიაში დარეგისტრირების საფუძველი, სააგენტო, ამ მუხლის შესაბამისად, იღებს გადაწყვეტილებას პრეტენდენტის/მიმწოდებლის გაფრთხილების ან შავ სიაში დარეგისტრირების შესახებ.

7.3. განსახილველ შემთხვევაში, დგინდება, რომ მიმწოდებელმა არაჯეროვნად შეასრულა ხელშეკრულებით ნაკისრი ვალდებულებები, ხოლო მხარეთა შორის, წარდგენილი პროექტის ხარვეზიანობის გამო, მიღება-ჩაბარების აქტი არ გაფორმებულა. შესაბამისად, სააგენტო მიიჩნევს, რომ არსებობს მიმწოდებლის გაფრთხილების ან შავ სიაში დარეგისტრირების საფუძველი.

7.4. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-3 პუნქტის შესაბამისად, გაფრთხილების ან შავ სიაში დარეგისტრირების შესახებ გადაწყვეტილების მიღებისას, სააგენტო, საქმისთვის მნიშვნელობის მქონე გარემოებებთან ერთად, დამატებით ითვალისწინებს დარღვევის სიმძიმეს, პრეტენდენტის/მიმწოდებლის მანამდე მიღებული გაფრთხილების თუ შავ სიაში რეგისტრაციის ფაქტ(ებ)ს, მისი სახელმწიფო შესყიდვებში მონაწილეობის აქტივობას.

7.5. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-6 პუნქტის თანახმად, შავ სიაში დარეგისტრირების შესახებ გადაწყვეტილება მიიღება იმ შემთხვევაში, თუ შემსყიდველი ორგანიზაციის

მიერ წარდგენილი ინფორმაცია სრულად აკმაყოფილებს ამ წესის მე-3 და მე-4 მუხლებით განსაზღვრულ მოთხოვნებს და არ არის სახეზე შავ სიაში დარეგისტრირებაზე უარის თქმის ან გაფრთხილების საფუძველი.


7.6. სააგენტო მიიჩნევს, რომ შემსყიდველი ორგანიზაციის წერილობითი შეტყობინება აკმაყოფილებს ზემოხსენებული წესის მე-3 და მე-4 მუხლებით განსაზღვრულ მოთხოვნებს. ამასთან, სახეზეა მიმწოდებლის შავ სიაში დარეგისტრირების წინაპირობა და არ არსებობს მისი შავ სიაში დარეგისტრირებაზე უარის თქმის ან გაფრთხილების საფუძველები, რადგან მიმწოდებელმა არაჯეროვნად შეასრულა ხელშეკრულებით ნაკისრი ვალდებულებები, ხოლო შემსყიდველ ორგანიზაციას არ ჩაუბარებია მიწოდებული დოკუმენტაცია, მისი ხარვეზიანობის გამო. შესაბამისად, მოცემული დარღვევის გათვალისწინებით, შპს „მრავალკუთხედი“ უნდა დარეგისტრირდეს შავ სიაში.

### სარეზოლუციო ნაწილი

სააგენტომ იხელმძღვანელა სახელმწიფო შესყიდვების სააგენტოს თავმჯდომარის 2015 წლის 29 ოქტომბრის №19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-6 პუნქტით და დაადგინა:

1. შპს „მრავალკუთხედი“ (ს/ნ: 437061144) 2019 წლის 14 მაისს დარეგისტრირდეს შავ სიაში.
2. ამ განკარგულების აღსრულება დაევალოს სახელმწიფო შესყიდვების სააგენტოს ინფორმაციული ტექნოლოგიების დეპარტამენტს.
3. ეს განკარგულება შეიძლება გასაჩივრდეს მისი ოფიციალური გაცნობის დღიდან ერთი თვის ვადაში, თბილისის საქალაქო სასამართლოს ადმინისტრაციულ საქმეთა კოლეგიაში (ქ. თბილისი, დავით აღმაშენებლის ხეივანი, მე-12 კმ, №6), კანონმდებლობით დადგენილი წესით.

თავმჯდომარის მოვალეობის შემსრულებელი



კახი დემეტრაშვილი